





風陵文庫  
文庫19  
F297  
5





長春道教源流卷五

羅浮酥醪洞主陳教友著

邱長春弟子紀略下

附馬劉王郝弟子紀略

王公志坦字公平號涓和相州湯陰人父忠以貴雄其鄉  
母岳妊時夢古仙來告曰此子成人必令學道否則將禍  
於而家公生不好弄甫及冠卽著道士服禮北京盧尊師  
盧丹陽法孫洞清于公高弟也素嚴厲公躬執百役靡有  
懈怠癸未秋謁長春真人於宣德一見器之傳付秘訣遂  
行化興中義錦間日丐一食雖蚊蚋嘍敗亦不屑棄匪茹  
而居不計何地遇昏暮卽止戊子聞清和宗師駐燕往參  
禮焉無幾何逕入金坡坐而煉化木茹澗飲人莫見其面

晦跡十餘年人無賢不肖皆曰金坡王先生有道之士也  
甲辰春真常真人招爲大度師夏從真常北上參授三洞  
秘籙以祈禳訶禁濟人其疾病藥石不治者假符水或以  
袂拂之罔不立愈皇太后欽挹真風寵賚以禮留居闕庭  
者六年還燕爲教門都提點燕去和林千六百餘里凡赴  
十有七馳驅寒暑略無艱苦狀憲宗元年辛亥詔真常祀  
嶽瀆以公爲輔行癸丑上問養生之術對曰此山林枯槁  
之士所宜非天子急務也天子代天理物當順天心與民  
興利則天降之福壽矣然開創以來戕橫天闕精魂無依  
非求諸冥冥中莫之能救因奏修黃籙大醮上喜卽詔設  
於長春宮甲寅三月將醮雲膚寸而雨公密禱於天遂霽

又有卿雲鸞鶴之應公卿文士咸作詩以贊其瑞真常厭  
世誠明嗣立公之力居多至元改元燕人楊提領於私第  
後園作環菴一區求清修高尚之士奉之僉曰金坡王練  
師可卽禮致焉七年誠明上仙詔公襲位仍加崇真光教  
涓和真人號九年十一月蛻形於長春之玄堂年七十三  
踰年葬於金坡山下從治命也時天氣肅冽比襄事化而  
陽春執紼者萬餘人汗皆浹背咸嗟異之公美儀觀愛讀  
書尤喜性理學度弟子數千人建庵觀百餘區所著信心  
錄六牛圖傳於世元高鳴崇真光教涓和真人道行碑○  
此碑見甘水仙源錄元史高鳴字雄飛  
真定人世祖召爲翰林學士遷吏禮部尙書有文集五十  
卷文內所稱盧尊師卽盧柔和洞清于公卽于通清見前  
通洞音近  
疑有一誤

酥醪洞主曰王涓和師盧柔和柔和師于通清其學實  
出丹陽然通清柔和及涓和皆禮長春則並長春弟子  
也長春學最平實而年又最高丹陽諸真再傳以下多  
師事之茲統列之爲長春弟子柔和事于通清稱入室  
又謂長春其本行當有可紀惜不傳

李先生志方號重玄子初名益字友之相州安陽人金朝  
故事新天子卽位例出諸王爲方鎮大安崇慶間宣宗以  
豐王來彰德先生時以高訾家推擇爲功曹掾有廉平稱  
尤精算術因之出入府中雅性重厚復小心畏慎故見親  
任至宣元年宣宗入繼大統明年車駕幸汴梁扈從以行  
補戶部令史當艱難之際柄臣高琪蔑視文吏其持下急

如東濕從事者多引去先生直道自任氣不少衰會被檄  
漕米餽燕師抵霸州值北兵大入幾至不測然憂世之懇  
每見於顏間一日忽謝病歸隆慮山適與丹陽法孫柔和  
子盧公遇便請執禮爲全真師入棲霞谷無憂洞深坐練  
化甲申聞長春邱公應詔還附盧公遠迓長春賜今名號  
時盧公有提點北京道教之命長春謂先生緣在彰德俾  
之南行卽營棲霞爲觀稍稍就緒會彰德總管趙德用請  
住迎祥觀先生乃命弟子康志宣主棲霞事丁亥長春上  
仙先生往祭因留宿檀順致心喪焉庚寅復還士庶懽迎  
皆曰吾家先生來也總帥蕭仲通奉疏請主天慶宮丁巳  
宗王穆哥遣使賜金冠雲錦羽衣仍加真人號先生住迎

祥天慶於棲霞蓋惓惓志宜物化復以尹志和塗志堅等知觀事庚申二月九日集眾留頌怡然而化其頌曰四大既還本一靈方到家白雲歸洞府明月落棲霞春秋七十六所著地元經行於世生平迭著靈異若萬鶴繞醮壇而翔飛蝗抱祭器而死虎承牒而殺田豕雪失道而作司南類此甚多然皆先生平日所不喜道故不具書元高鳴重生返真碑參李誠棲霞觀碑○高碑見甘水仙源錄李碑見林縣志金史章宗紀大定二十九年進封豐王加開府儀同三司累判兵吏部又判永定彰德等軍據碑文則判彰德在衛紹王時元史太祖紀十年乙亥三月金御史中丞李英等率師援中都戰于霸州敗之碑文云抵霸州幾至不測卽是時元史宗室世系表憲宗次九子末哥大王碑云丁巳宗王穆哥丁巳憲宗七年穆哥卽末哥也

酥醪洞主曰余讀宋史文天祥傳稱天祥被執至京師

世祖求才南官王績翁言南人無如天祥者遂遣績翁諭旨天祥曰國亡吾分一死矣儻緣寬假得以黃冠歸故鄉他日以方外備顧問可也績翁欲合宋官謝昌元等十人請釋天祥爲道士留夢炎不可事遂已夫人臣不幸當易代之時潛身草野託方外以自詭古多有之然元時禁網疏闊宋之遺臣如馬廷鸞章鑑家鉉翁張山翁王鼎翁鄭思肖謝翱輩皆不必遁迹二氏惟何時以知縣從文天祥起兵兵敗削髮爲僧汪元量以善琴從太后北行勉文天祥以忠孝白天下後世祖賜爲黃冠南返耳並見明錢士升南宋書信國忠烈不知何以願託黃冠而績翁等又欲釋之爲道士及讀中州集乃知金亡後

其遺臣不甘仕元者如翰林學士張本南陽酒官王元粹太學孫邦傑及進士秦略之子彥容禮部尚書王競之孫道通等後皆為黃冠師張本王元粹孫邦傑秦彥容並見下卷王道通未詳中州集又云麻徵君九疇少嘗就道士學服氣史御史肅晚亦欲棄官學道未遂而卒而王鶚撰李真常道行碑則云河南新附士大夫流寓於燕往往竄名道籍飯於齋堂者日數十人蓋元初尊禮長春凡其徒眾免死與奴一切不問意信國囚燕京時親見其事因發為是言而績翁等亦欲遂其志歟然汴京之破蔡州之亡後長春之化六七年當時遺臣雖竄名道籍皆不及長春之門惟李志方李志全馮志亨諸人見幾獨早親禮長春得其印證成就亦自卓卓金源遺獻以

野史傳者元好問劉祁外寥寥無幾劉祁歸潛志頗詳載不吾意當時以黃冠歸故鄉備顧問者頗不乏人而惜乎姓氏無考也嗚呼滄桑而後匿跡銷聲者多矣况老氏之旨固以知希為貴耶

陳志益自號重顯子單州琴臺人生有淑性兒時已不茹葷血大定間禮丹陽之高弟同郡靈真子尸居環堵久於鍊化故得道甚敏及謁長春宗師知修行之要獨善其身不若廣建道場為大利益事自是所至之方苟有緣契必盡心焉建築者計百有奇嘗住持葛公山清虛宮後自武川來遊恆山設教度人司倉張瑋輩傾心事之既日聞道妙咸有社稷尸祝之意重顯子曰吾得一把茅一盂飯足

矣何苦以膠膠羨物為哉所憚者聖賢無象設宇門弟子

無揭香火處耳衆雜然曰謹受教乃於恆山大茂峯之東

地名帶耳谷創築淵靜觀已丑瑋割腴田三十畝始基之

輸幣入粟者絡繹不絕庀工董役旬三浹遂成壬辰春順

化享齒八十一贈洞虛真人元高鳴淵靜觀記○此語見

金天興元年壬辰非元至元二十九年壬辰銜稱河東高

鳴撰鳴時尙未北渡為元官也又直隸唐縣北葛公山有

清虛宮重顯子返真碑

銘亦高鳴撰未見拓本

李師志柔字謙叔號同塵子洛水人父志微從太古高弟

開立李君受全真教法泰和辛酉師亦事開立執弟子禮

開立識為受道器付授無所隱自是鍊心養性丐食邢洛

間雖絕粒數日志不少衰尋隱居仙翁廣陽兩山謝絕人

事者十二年開立及志微上仙後西山盜起遷邢臺築通

真觀居之庚辰春聞長春道燕趙師以禮餞行癸未長春

南還師復迂於宣德之朝元觀長春賜今號教以立觀度

人將迎往來道衆為務師恪遵立訓建長春於漳川奉天

棲真於大名丙戌復詣燕觀寶立堂參證心印明年秋長

春返真師南歸向化者益衆門弟諸方起建大小菴觀二

百餘區樓觀宗聖宮道士張致堅以廢址係立元道祖演

道德經聖蹟天興兵亂焚燬殆盡狀懇清和宗師重建清

和以狀付師營繕未幾遂成丁酉真常宗師署師大名邢

洛兩路教門提點庚戌洛州牧石德玉保奏賜黃金冠服

加號同塵洪妙真人中統癸亥師還樓觀至元丙寅夏脩



然順化年七十八方斂息之際宮北焦家巷居民見空界五雲浮動仙音朗徹奔往視之師乃昇矣既葬赴喪於東門人忽見大名奉天宮羣鶴飛鳴下直壇殿須臾訃至識者以為師之神遊焉

元李道謙同塵真人李尊師道行碑○此碑見甘水仙源錄

劉君道寔號真常子雲中白登人生不好弄閑與諸兒戲必結庵趺坐曰我學道爾泰和壬戌聞渾源隱士劉柴頭號得道師事焉師歷試諸難至遣乞食君皆樂從師遂授微旨自是東遊海上西歷關中從學者日益眾癸未秋長春入覲回君執弟子禮迓諸銀海之東問君之初事以柴頭對師領之曰仙人中天隱也因授秘訣錫今號長春仙蛻尹清和命主華山之雲臺丙午春應召至燕預長春宮

醮事五月旋車古恆請州牧高仲揀洎門人許志安屬以後事日將中曲肱而逝春秋七十五君嘗作巴人曲接引於眾又著會仙隨應總仙三錄以道神仙可學之事臨終語門弟子曰可於丈室瘞吾軀榜以倏然足矣渾源學士魏公邦彥遂以臨終之言名其堂

源錄

元王鸞真常子劉君道行記○此記見甘水仙

酥醪洞主曰渾源隱士劉柴頭余徧考諸書不得其事實然元王暉秋澗集有渾源劉氏世德碑稱遼末遠祖諱用者生子翰翰生撝字仲謙天會二年以詞賦第一人中選金國一代詞學得人為盛由公有以振起之釋褐右拾遺由知縣遷安東節度副使兩貳大理寺累官

中大夫愛渾源山水佳勝因家焉晚號南山翁生四子  
汲渭滂濬滂早世汲與弟渭同擢天德三年進士官應  
奉翰林文字有西岳集行世一子侑大定十年進士第  
豐王府文學兼記室參軍孫一從夔奉職出身渭終岢  
嵐州刺史一子价河水泊酒監濬用蔭仕至饒陽令四  
子似儼僕似真定軍資庫使三子從善從皋從契從  
善彰德府酒監從契克勝軍副都統孫五曰郊武義將  
軍曰郅等俱早世似用恩賜第官沂水縣簿一子從益  
大安元年進士乙科官至翰林應奉有文集十卷二子  
祁郁祁弱冠舉進士壬辰北遷築室榜曰歸潛戊戌詔  
試魁西京選充山西東路考試官有神川遯士集二十

二卷處言四十三篇歸潛志三卷行於世郁中統元年  
中省辟左右司都事拜監察御史儼承安二年進士第  
官秘書少監壬辰北渡蹈河而死三子從禹從愷從稷  
從禹正大七年詞賦第官同州錄判一子曰都從愷以  
蔭官登封主簿終河南府路經歷三子廓廓鄰廓平江  
路匠人提舉郃袁部場管勾鄰由省掾歷官監察御史  
從稷終濟南路儒學教授三子郇郇郭僕遂州酒監一  
子從周據碑所述自金至元父子昆弟俱相繼擢第爲  
名士夫作良牧守其未仕者從皋從周及都郇郇郭六  
人耳劉柴頭蓋南山翁後裔惟不知當何人然家門曷  
奕而能脫屣富貴學道窮山中長春謂之仙人中天隱

宜哉

李師志明字用晦號棲真子潞之壺關人九歲去父母爲全真學禮樊山潘先生爲師稍長遇超然廣化王真人授以火候周天之法鍊陰爲陽之術後事長春真人命名與字一切勞役皆令備嘗然後誘以至道之妙示以用力之方師亦力强志苦至脇不沾席者逾十年長春曰李生受道之器非餘子所及也居無幾歸太原人無識者但以單子李師父目之時方進取戎馬星屯汾晉間劫攘戕害所在多有庚寅太宗南伐駐蹕并之古城師拜覲天光上因勅兵人有暴奪者以軍法從事遂著爲令末幾府尹石抹公疏請住持天慶故宮天慶兵亂鞠爲荆棘師慨然興復

語衆曰度道士守宮觀雖近代之制然自漢武時於甘泉宮中爲臺畫天地太一諸像其來遠矣吾道家者流雖恬淡無爲以治其心可不分祉祝釐爲立教之跡乎遂盡力營繕觀成爲一方之冠見榮祿宋公所撰萬壽宮碑戊子夏府中僚屬祈雨以師主醮事已而澍雨霑浹歲以大豐宣差完顏胡失刺暴得奇疾氣息幾絕師呪咀杯水下咽復甦中統二年陞河東南北兩路道教提點越明年左仙翁保奏於永宣邸授棲真洪妙真人號至元丙寅建子月返真年六十七元王博文棲真子李尊師墓碑○此碑見甘水仙源錄元詩選癸編王博文東魯人少與王惲王旭齊名累遷至御史中丞史公志經字天緯號洞立子絳州翼城人貞祐甲戌翼城

再陷流寓雲中主完顏氏家興定辛巳遁跡投立禮恆嶽  
劉真常師癸未長春宗師應詔東還公從其師拜於阿不  
罕私第長春訓以今名自是盤桓蔚代朔應間研精問學  
弊衣糲食晏如也辛丑西遊著華山志十四卷丙午劉真  
常羽化詣渾源哭之且心喪二年己酉拜于洞真參授經  
錄辛亥從李真常北覲例賜紫衣加號立真宣義大師乙  
亥春以後事囑諸嗣師遂神遊於所居之松菊堂春秋七  
十四元王鶚洞玄子史公道行錄參李道謙  
後跋○此錄及後跋俱見甘水仙源錄

楊至道灤州馬城縣之靈泉人其通玄大師號前金之賜  
書也先世四傳惟一子父冲常以陰德自力生通玄兄弟  
六人其次伯義奉先人祀季早世長伯和又其次道夷次

至堅及通玄皆爲羽衣通玄性剛明有志節然自擗抑見  
於眉宇者常穆如也爲人推誠不喜以囊橐相覆掩凡歷  
艱險必先諸人其館穀往來羽流倒困樂爲之明昌庚戌  
改衣入道朗然先生之所引度也旣陪杖屨三年尋有四  
方之志抵武清居園堵不接人事者三載起過惠州經靈  
巖脫冠跣足穴洞其中首鼠十年及洞成有泉出焉今所  
謂滴水洞也泰和丁卯惠州神山縣官屬耆德尙其志邀  
至境爲起太清觀貞祐改元復雲水於興平間大朝燕京  
行省參謀國家奴景州牧王仲温潤州牧李濟等奉景州  
之蘇家莊隙地南北二十東西三里有奇聽耕鑿卜築於  
其中乃營二清正殿及雲堂香積等又闢土墾田十餘頃

為居徒饘粥計觀落成適長春以中旨賜還遂趨赴參禮

且請觀名長春以開陽命之壬辰十二月示微疾說偈而

終門人仍祠於觀之東偏歲時會祭不輟

金張本修建開陽觀碑○此碑

見甘水仙源錄張本於正大九年從曹王出質容居燕京長春宮碑云丁酉春景州開陽觀羽士謁文刻石則作於蒙古太宗九年時金亡已三載矣文稱蒙古曰大朝以此朗然先生係丹陽弟子劉真一見後

李講師志全字鼎臣號純成子太原太谷人父洵直以經

義中明昌五年第講師少業進士當立之年不意世變干

戈日尋遂不復進取時天子好長生之道不遠萬里召見

邱長春講師依河陽張尊師為引度聞長春西廻策杖徒

步謁見於奉聖龍陽觀長春授以道妙及今名號自是山

居有年東萊宋披雲以道書焚於劫火奉朝旨收拾散亂

講師為校讎始終十年朝夕不倦三洞靈文號為完書教

主李真常奉恩例賜純成大師號提點燕京立學中統二

年六月上昇年七十一著有耐泉集三十卷又集七真以

下諸師詩賦二十卷目曰修真文苑

元李蔚純成子李君墓誌銘○此銘見甘

水仙源錄李蔚未詳銜稱宜授懷孟路提學李蔚慶之撰當元官慶之乃其字也

馮公志亨字伯通寂照其號同州馮翊人五代瀛王道之

後弱冠業進士兩赴內試不中崇慶兵亂還鄉本州節度

使奧屯肅請攝教授事辭大兵西征北渡寓德興癸未長

春宗師自北闕迴道過焉公為長春感發即願奉几杖謁

真常真人為先容真常引見列門弟子中既還燕一夕長

春指公謂諸尊宿曰斯人他日必能扶持吾立門後事也

及長春仙去公謂清和真人曰道教之興今日爲盛長春  
宗師人貌而天者也教門後事屬意在君請毋多讓遂集  
道衆并達官貴族就迎於所居之靜室清和初閉門不納  
公參戶而入扶至堂上使衆羅拜名位遂正乙未清和遺  
公書以年邁求退公念真常攝行此事已十年丁酉公取  
立清和時扶護之禮按爲典故遂立真常先是承詔教授  
胄子十八人公選名家子弟性行溫恭者如其數爲伴讀  
令讀孝經語孟中庸大學等書後皆克自樹立戊申真常  
依恩例奏賜公金襴紫服佐玄寂照大師號遷充教門都  
道錄權教門事及將立玄學公復力爲贊助直至於成甲  
寅八月示疾卽真壽七十五與公相往來者梁運使斗南

陳翰林秀玉吳大理卿德明輩每論當世人物至以幸輔  
之器許之其雅量高致爲可知已

元趙著佐玄寂照大師  
馮公道行碑銘○此銘

見甘水仙源錄趙著未詳歸潛志王鬱小傳云從遊最  
久者爲趙著又未附有漁陽趙著光祖贈詩當卽其人

房師志起號冲虛子濰州昌邑人幼業儒旣而以異夢有  
覺遂入道參邱長春尊師於海上長春目其氣志非凡殊  
稱異之命主馬坊之清真觀師氣貌魁奇操行清峻通古  
今善象籀樂與名士大夫遊至於醮祭之獲福雲鶴之顯  
異所在驚動耳目壬寅聊攝趙侯請師住持郡之玄都宮  
道出衛州汲長趙實以治城崇道里隙地奉師爲玄覽別  
館師集其徒告曰吾大方家雖清虛自然爲宗要以應時  
行化爲務詎容山林長往歸潔一已乎衛之士中而處會

俗美而易化不於焉闡教尚何往乃命門徒孟志之趙志  
樸創建紫極宮未成師委蛻仙去遺命志樸等勉率前志  
至元甲申訖功王憚爲之碑且曰遺山謂師外朴而內敏  
質直而尚義似夫墨名而儒實者蓋確論云戊寅志樸以  
師德請於朝敕賜宏真體靜真人元王憚衛州紫極宮碑  
銘○此碑見秋澗集  
劉志淵字海南蒲州府萬泉人方其未生有牡丹先開之  
兆及生紅光滿室迨爲兒童不作嬉戲事親至孝自號玄  
冲子慕仙學道後遇長春真人於棲遊菴金末兵亂志淵  
避於綿山雖九軍搜獲萬騎蹂躪身不離於側亦不罹於  
害殆仙家所謂兵無所容其刃者及厭世自留句有七十  
九年倏忽間而今脫殼出塵寰云山西  
通志

董志平字道衡完縣人家世農業年十九師邱真人教以  
全真秘語傳之鐵冠賜號通真志平以醮感鶴以神應夢  
水蕩神扶仙靈懷玉迭著神異一日疾不食不言惟出手  
番一覆二指空喻十五日上昇也至日薰沐跣趺而坐出  
頌示人曰性似團圓月光華照影清自從雲斂後何處不  
分明頌畢而逝度衆三百五十餘徒年七十九歲畿輔  
通志  
范常真邱長春弟子隱平度盤石山能馴猛獸人稱爲狼  
范後尸解去萊州府志○考淮安府志狼范者失其名始  
監海州倉歲饑私貸糧以活多人事覺將刑  
於市忽見神人披髮仗劍衛護之所司異焉乃開釋其罪  
先在獄時有一老母旦夕饋食尋請之至城東門見而謝  
母曰我驪山老母也緣汝有陰德在仙籍故來祐汝往當  
修行言訖不見遂入山苦志精修與豺狼同處人見而神  
之後不知所終當卽此范常真又考泰山志至元十八年  
創修通道宮碑云古陽子丁公超然苦志道價非常公禮

青社萬壽真常子慈惠真人范尊師師師長春法嗣也又  
泰山志通觀記云古陽子丁公遊於東楚遇真常真人  
禮而師焉則常真當真常之誤所云  
遊於東楚疑卽范監海州倉時也

蔡江月滿城人母王氏感夢而生六歲始能言七歲出家  
戒行嚴甚大安初聞邱真人卽恭詣之口受其訣遂得悟  
焉元帥張柔領軍治滿城以狀奏之賜湛然江月真人之  
號丁酉年五十九告弟子曰久苦塵俗殆將歸矣翌日具  
衣冠端然而逝不雲而雪樹木皆掛比葬有鶴翔翔人以  
爲仙去有江月集行於世畿輔通志○元史張柔傳戊寅  
柔攻破賈瑀徙治滿城丁亥移  
鎮保州丁亥太祖二十二年是歲長春羽化柔狀奏蔡  
真人當在前數年蔡真人羽化在丁酉則太宗九年  
張真一汾陽人修煉於城西十里之西巖古洞元初村民  
田氏築菴居之後叅邱長春賜號丹華子還守舊址丁亥

五月二十八日有白鶴自良方來止於巖際久之向坤飛  
去明年是日復至如是者三及真一羽化遺音至今存焉

山西  
通志

王志祐號棲神子林慮人幼業儒術及長慕玄理由平水  
抵王屋山山巔曰天壇其南有陽臺觀金貞祐甲戌邑令  
延爲住持始長春游秦過河陽孟州結菴而居揭名嶽雲  
秦和興定間創爲觀乙未棲神至孟州復修飾而潤色之  
棲神以靜爲基以慈爲寶不讀非聖書不作矯俗事年高  
行積途之人望而歸之不翅其家其徒於香火之隙研精  
語易十常四五已亥三月上昇壽八十八包志安繼主嶽  
雲觀壬子嗣教李真常准恩例改爲宮元李俊民重修陽  
臺萬壽宮記參楊



道五  
與重修嶽雲宮記○李記見濟源縣志楊記見還山遺稿  
元史李俊民字用章澤州人得河南程氏傳授之學金承  
安中舉進士第一應奉翰林文字金源南遷隱於嵩山世  
祖在潛藩以安車召之既見乞還山卒賜諡莊靜先生按  
棲神化於己亥係蒙古太宗十一年入十八少長春四  
歲濟源志有長春題天壇二律是長春會至王屋山棲神  
後又居長春之嶽雲菴當係長春弟子國朝畢沅申州  
金石記載有天壇十方大紫微宮記李志全撰大朝庚戌  
八月立云碑述沁州杜德康及夫人王體善施舍之事杜  
侯一門自於長春國師几前親受法訓然則王屋山道士  
多禮長春不  
特棲神也

張師志玄字隱微號寂然子河東孟門縣人自髫鬣從平  
水景鍊師為全真學於正一法錄亦稱精究貞祐南遷所  
在俶擾聞長春邱公應聘龍庭喟然歎曰天道在北吾將  
遠遊雲朔以隆道紀至永興之清樂鄉結茅而居眾異之  
間有請必恍然開悟乃相與剏觀居之榜曰迎仙尊顯之

也師佩上清三洞靈章主盟武定幾二十載度門徒甚眾  
惟吳張盧三法師得其傳而吳為最師謝世藏觀南化臺  
吳號通玄子通文辭知醫藥人或參叩誦答如流有一鉢  
千家飯渾身百衲衣心如江月朗情似野雲飛之句達官  
豪右共來敬禮遂易亡金劉太監別墅為棲真所署曰永  
昌與迎仙為上下院而張法師所建永興之觀盧法師所  
建定安之白雲觀與永昌同一法眷云元王惲奉聖州新  
建永昌觀碑○此  
碑見秋澗集志玄慕長春而遊雲  
朔後亦當謁長春碑未及載耳

酥醪洞主曰元代正一之教盛於南方然考張天師世  
家第一代為張道陵三國志  
作張陵道陵生衡衡生魯魯行其  
祖父之道據有巴漢後降於魏太祖封闡中侯子盛太

祖封都亭侯弗受始自漢中還龍虎山按三國志太祖封魯五子爲列侯魯薨子富嗣侯盛不受封蓋在五子之外又魯降後漢中旋失於蜀則魯及五子當隨太祖遷北方魏書釋老志稱寇謙之修張魯之術守志嵩岳遇太上老君謂之曰自天師張陵去世以來地上曠誠修善之人無所師授吾故來觀汝授汝天師之位始光初奉其書獻之世祖世祖崇奉爲天師親至道壇受符籙自後諸帝卽位皆如之是謙之實得法於魯之後裔顯其術於北方自是而後沿及唐宋北方羽流多習之者全真之教不言符籙重陽長春及諸真皆然而其徒隨俗爲禳禱兼通正一蓋所不免若張志玄亦其一也

及元之諸帝命張宗演張留孫吳全節輩設醮於長春宮自是全真家通正一者漸衆而張守清得先天之道爲元武宗仁宗所尊寵

事實詳後

故武當全真一派以正一

著者尤多特仍守本宗修性之旨耳學術之歧必有其漸因究其遷變如此○明宋濂潛溪集有漢天師世家序紀述綦詳序云漢天師道陵字輔漢建武十年生於吳之天目山暨長博習羣書從學者千餘人尋中直言極諫科拜巴郡江州令棄官隱洛陽北邙山修煉形之術章帝以博士徵不赴和帝卽位召爲太傅封冀侯亦不就乃杖策遊淮入鄱陽上龍虎山合九天神丹訪西仙源獲制命五嶽攝召萬靈及神虎秘文於壁魯洞俄

道五  
往嵩山石室得黃帝九鼎丹書及道既成聞巴蜀沴氣  
爲人菑銳意入蜀初居陽平遷鶴鳴山感立元老君屢  
受以經籙之法於是分形示化復立二十四治增以四  
治以應二十八宿妖厲爲之衰熄如發鹹泉破鬼城之  
事甚多不能備載永壽二年復遷渠亭山出三五斬邪  
雌雄劍二陽平治都功印一授嗣天師衡使世世相傳  
乃乘雲上升壽蓋一百二十又三云衡字靈真有長材  
詔徵黃門侍郎避隱居陽平山誓以忠孝導民君子謂  
其有繼宗開緒納俗安善之功衡生系師魯字公祉益  
續前人之烈以鬼道教人自號師君其來學道者初皆  
名鬼卒受本道已信號祭酒各領部衆多者爲治頭大

祭酒皆教以誠信不欺詐有病者自首其過復設義舍  
置義米肉其中任人量腹取飽過取則有禍人歸者日  
益衆遂雄據漢中詔授鎮民中郎將領漢寧太守其後  
歸魏太祖拜鎮南將軍封閬中侯五子皆爲列侯女歸  
太祖子彭祖魯死諡原侯魯生盛字元宗魏太祖封都  
亭侯弗受始自漢中還龍虎山創三元日升壇授籙盛  
生昭成字道融端坐石室虎豹逢之皆伏暨化去或見  
騎鶴遊空中啟冢驗之唯冠履留耳昭成生椒晉安帝  
召之不至椒生回回生迥迥生符符生祥祥字伯麟隋  
洛陽尉能吐丹寘掌中光芒穿屋復吞之祥生通立歲  
大疫以標植水中汲飲者咸愈通立生恆唐高宗問治

國恆對曰能無爲則天下治矣上嘉之恆生光光生慈正慈正生士龍士龍亡玉印長安酒家一少年盡力舉之不動明日士龍笑而攜去士龍生應韶應韶生頤頤生士元字仲良瘠而多髯居應天山四十年山多虎人莫敢謁焉每大風雨遙見乘黑龍往來諸峰間士元生脩脩生謹謹生秉一字溫甫目光如電夜能視物嘗負劍行山澤間叱一老樹雷卽震裂之擊死二巨蟒及小蛇百餘秉一生善善生季文五代之季受其錄文者頗衆乃鑄鐵環券數萬與之季文生正隨宋大中祥符八年召至闕賜號曰真靜先生後凡稱先生者皆賜號也吏部尙書王欽若爲奏立授籙院正隨生澄素先生乾

曜乾曜生虛白先生嗣宗嗣宗生象中字拱辰生三月能行五月能言七歲朝京師錫以紫衣象中生葆光先生敦復無子從子葆真先生景端嗣景端亦無子從弟虛靜先生繼先嗣繼先字嘉聞五歲不解言聞雞鳴忽失笑賦詩人異之崇寧初解池鹽水溢遣使者召見書鐵符投之怒霆磔蛟死於水裔一日隨上入寢殿宮嬪競以扇求書繼先以經語書之皆密契其意中舉一握稽首書曰保鎮國祚與天長存乃上所御者也上奇之命禱雨三日乃止授太虛大夫不拜詔江東漕臣卽山中度地遷建上清觀改爲上清正一宮從其學道者恆數十百人靖康初上復召時金人犯汴行至泗州天慶

觀索筆寫詩隱几而化葬于龜山之麓後十六年西河  
薩守堅遊青城山相遇於峽口繼先以書一封赤烏一  
隻令達嗣天師家嗣天師大驚使人啟龜山之窆唯一  
烏存繼先無嗣以象中之孫時修嗣時修曰繼先從子  
也吾烏得後之衆曰法統所在孰得而奸乃從時修生  
正應先生守真守真在母胎歷十九月始產毗陵有妖  
憑樹詔劾之一夜風雷拔去後定江濤衝決高宗賜以  
象簡寶劍清靜陰符二經守真生景淵景淵生慶仙張  
公洞有井甚深慶仙戲折木葉擲之俄波濤騰湧有一  
老翁從中出慶仙呵戒之而去慶仙無子從子觀妙先  
生可大嗣可大守真之曾孫其祖伯瑀父天麟皆嘗掌

教事鄱陽水漲壞民廬無數袁提刑甫請可大治之殛  
死大白蛇水遂平尋又遇旱蝗可大崇之雨作而蝗殪  
勅授提舉三山符籙兼御前諸宮觀教門公事主領龍  
翔宮時當宋季元世祖聞其神異密遣間使訊之可大  
授以靈詮且謂使者曰善事爾主後二十年當混一天  
下逮至元十三年果驗可大生宗演字世傳世祖平宋  
憶其父言有徵應遣兵部郎中王世英刑部郎中蕭郁  
賈詔召之賜玉冠玉圭冠以靈應沖和真人之號仍給  
三品銀印令主江南道教事得自出牒度人爲道士宗  
演生與棣字國華世祖時宣受體立弘道廣教真人賞  
賚優渥竟卒於京師與棣無子弟與材嗣與材字國梁

元貞初入見大明殿制授太素疑神廣道大真人大德  
二年海鹽鹽官兩州潮水大作沙岸百里蝕齧殆盡延  
及州城下與材投鐵符於水符踊躍出者三雷電晦冥  
殲怪物魚首龜身其長丈餘隄復故常五年冬無雪上  
日冬無雪民間得無有灾害乎與材爲建壇禱之是夜  
雪下盈尺上大喜命近臣賜酒曰卿能感神明一至此  
耶八年錄平潮功加授正一教主兼主領三山符籙給  
以銀印視二品九年崇明州海隄崩俾弟子持符往劾  
之民夢有神填海者遂安至大初加賜寶冠金服制授  
金紫光祿大夫封留國公給以銀印視一品與材生太  
玄子嗣成嗣成卒弟嗣德嗣德卒其子正言嗣正言

卒太玄之子正常嗣正常字仲紀卽今天師洪武初六  
觀京師制授正一護國闡祖通誠崇道弘德大真人領  
道教事給以銀印視二品上復賜以褒文稱其瞳樞電  
轉法貌昂然人以爲榮蓋歷代相傳以眼圓而鉅者謂  
爲玄應故上因及之云自正常以下  
詳明史稿序末又稱魯在巴  
漢垂三十年民生晏然行者不裹糧居者不捍關官府  
賴以成治其功之及物甚大然王世貞宛委餘編據裴  
松之註所引典略則謂陵之法略與張角同角在中國  
事露至反族滅漢亦因以亡而陵在蜀漢用僻故幸不  
敗傳至子衡孫魯曹操破之始請降封侯萬戶傳國累  
葉至唐宋間復世掌道教又引李膺蜀記云張陵避病

癡於邱社中得呪鬼術書爲是遂解使鬼法入鵠鳴山  
自稱天師漢熹平末爲蟒蛇所翕子衡奔走尋屍無所  
乃假設權方以表靈化生糜鶴跡置石崖頂到光和二  
年遣信告曰正月七日天師昇立都衡爲係師衡子魯  
爲嗣師以法惑亂天下然則今之所傳張道陵者乃蛇  
腹之餘殮耳其詆之甚至綜而論之陵之術實爲道家  
符籙所由起三國志評張魯謂其舍羣盜列功臣去危  
亡保宗社亦見幾者特非老氏清靜無爲之本旨耳○  
又按陵之術大顯於寇謙之而元代張留孫吳全節亦  
得其傳見重於世主不必張氏子孫也惟自元以後精  
究者稀明史稿稱張氏自正常以來專恃符籙祈雨驅

鬼闕有小驗蓋已漸失其傳若錢謙益所著萬尊師國  
樞傳彙記其救効神異之蹟末云昔虛靖天師沒後十  
六年西河薩守堅遇之青城山遂相授受尊師得法峨  
眉嗣薩祖而虛靖冥通證明云云若斯之徒近不復覩  
其稱正一教者大抵皆火居道士欺謾庸愚爲衣食計  
蓋不足言矣

妙真大師嘗守慎族出金鄉女冠耆宿也大朝癸未秋間  
長春國師應詔廻道迎數舍自爾住燕親炙師席省心立  
訓師承特旨於泰安縣城西北隅崇建長春觀丙申鎮撫  
王友省奉先行臺公命令妙真住持妙真與趙守淵王守  
志積累修緝凡二十餘年觀始落成丁巳元和子自梁父

同以文碑之元和子稱妙真修學儻來不爲得儻去不爲  
失不悅生不惡死沖而用之厥心不震此得性之功也動  
與陽同波靜與陰同德寢無夢覺無憂虛而待也其生乃  
全此保命之效也予景仰久矣幸覩芝眉年已長而色若  
孺子聞所言如聞天籟於隱几實使予之意也消云元元  
長春觀碑○此碑見泰山志跋云  
元和子不詳姓名似亦長春弟子

酥醪洞主曰礪溪集有贈離陽唐括姑詩序云唐括姑  
故丞相之女弟也予時在隴山京兆統軍夾谷公專人  
書召姑尋至又有博州戰姑庭楸詩序云聊城之南鄒  
氏之室有戰姑者本蓬萊人生有巧思以綵縷紉鳥獸  
魚蟲花草之類隨物變態不待規模而應之於手其精

神過於生者遠甚中年後寡居信道甚篤建菴設食以  
待四方煙霞之侶佻薄者構爲謗讟用浼松筠之操姑  
知不易明會其戚屬指庭下枯楸而祝之曰仙聖在上  
妾身若無毫髮過願樹復榮彼楸樹者以大定庚子始  
植旣植而死風摧雨剝殆幾五稔越明年乙巳之夏卽  
姑始禱之月也忽爾靈芽發於枯樹之下狀如朱草日  
引修條茂葉蔽於階砌予在陝右屢聞是說明昌辛亥  
塗經此州聞閭里讚道及寓姑之家庭而後悉其事爲  
不誣自樹復榮今六載矣高可倍尋異於凡木其旁枝  
四出偃蹇遒勁森然有拔俗凌雲之氣至誠感物明德  
動天其戰姑之謂乎按唐括姑戰姑當屬長春弟子自



重陽化丹陽後並化其妻孫不二當時婦女學道者多  
然修真一事所以求善吾身而復吾性重陽長春功行  
極大於人無所不容後之學道者要當別嫌明微無以  
此爲藉口如戰姑者幾不自明此亦當引爲戒也

以上長春弟子未及禮丹陽諸真者

李道謙所著祖  
庭內傳

源錄專爲祖庭作紀丹陽弟子略備長春弟子亦見  
其中然不能詳也寰宇訪碑錄載有修真觀長春真  
人門徒王史郭公碑聶明德撰張麟正書至治元年  
十月在山東淄川關中金石記載有仙源圖李元覽  
正書泰定二年下元日在陝西華陰朝元洞云此載  
長春真人以下門徒法孫等姓氏刻創修朝元洞碑  
後並未見拓本竊謂北方金石及府州縣志所  
紀長春弟子當不止此數異日搜得再爲補遺

附

姚先生玳號雲陽子終南蔣夏村人與重陽祖師有總麻

之親大定丁亥重陽詣門告別問將安往重陽告以游海  
上邱劉譚中捉馬之行先生素以害風相待笑而別不數  
年邱劉譚馬四師來居劉蔣先生愕然曰向重陽告別之  
語今果驗矣乃棄家捐累乞受道於丹陽宗師丹陽教以  
修真奧旨及賜今名號仍贈以詩云灰心忘富貴槁體樂  
清貧甘作逍遙客長爲自在人氣中須養氣神內更頤神  
不着纖毫假方能得至真先生得法之後目不交睫十有  
餘年深入大妙後隨丹陽東歸游歷磁相間愛滄陽風俗  
醇厚築白雲菴居之一日謂衆曰師真有命吾其歸乎日  
方卓午跌坐而化年七十二有破迷信行世  
祖庭  
內傳  
雷先生大通號洪陽子延安人嘗以詞賦魁鄉選時人以

解元呼之大定乙未秋謁丹陽宗師一見若有夙契丹陽東歸留居祖庭甲辰春聞丹陽上仙杖履往奠明昌初過滕郡愛嶧山幽邃築修真庵於響石澗弟子數百人惟靈真子馬了道清明子王志專爲入室辛未秋先生謂門人曰百六數窮劫災斯至吾不忍處世也遂示微疾而逝時京兆來靈玉號真陽子亦鄉試解元大定庚寅禮丹陽宗師後侍丹陽歸海上事蹟不傳

祖庭內傳

劉先生真一號朗然子登州黃縣人弱冠試春官占甲科人呼以解元忽得泄瀉疾百療不效大定己丑秋重陽祖師挈丹陽長真長春過其門母氏設齋供養以子疾告祖師曰此吾門大士非汝家子也許之入道則愈矣母焚香

跪諾祖師以餘飲與之汗出如洗遂漸瘳祖師上昇先生入關禮丹陽宗師復相從東歸丹陽將羽化謂先生曰汝緣在北方可往矣自是北游平灤至撫寧築重陽觀度門衆數千人北方道教先生闡揚之力居多泰和丙寅二月召入室弟子邱道明日吾其歸矣丹陽金玉集進道之要當鏤傳之須臾假化所作曰應緣集

祖庭內傳

李先生大乘號靈陽子平涼府華亭縣人嘗中鄉選中歲試御簾下第慨然有煙霞之志大定戊戌秋丹陽宗師西行先生邀至私第執弟子禮己亥二月丹陽就先生花園築環約同居百日花園中林檎一株已枯死命於四月十四日移栽環內作詩云天上三十六地下三十六天地入

寶瓶七十二候足至五月二十日枯幹復榮無何丹陽挈居祖庭數載之間屢蒙印可壬寅丹陽東歸長春謂先生曰吾道東矣時館陶劉武節官鄆縣與先生善官滿請先生東遊至家築菴奉之劉亦入道爲門弟子自是徒衆雲集又數年示疾順化體若蟬蛻而輕觀者歎異關中兵後道衆復卽先生花園築爲太清觀

祖庭內傳

趙先生九淵字幾道號湛然子隴州隴安縣人少習儒業中鄉試甲科隴人以解元呼之年逾三十未嘗婚娶大定戊戌丹陽演教隴川先生見之心醉請預弟子列丹陽還祖庭先生從居之朝夕叩參於道德性命之學大有所得壬寅丹陽東歸先生往來終南鳳隴間河內張邦直尹扶

風日常延致其家與之談道爲忘形之交先生非法之言略不出口聞談他人短輒瞑目不與接所至人敬慕之正大未鳳隴兵亂不知所終于洞真住持祖庭訪得其遺文目之曰思立集

祖庭內傳

趙真人悟立字子深號了真子出臨潼之零口民家母魏孕十二月生時室有光煜然早孤事母以孝謹稱丹陽馬公扶重陽柩過零口真人迎館於家與之語遂相契因謂母曰人生幾何汨沒一世間徒勞人耳不若棲心立門可以悟理可以明性母曰若果有志吾與俱往乃舉家入道事丹陽於劉蔣丹陽教以息心養性之術浸有所得長安人趙恩虛第宅以請師弟入居其中今蓬萊觀是也其後

丹陽東遊有段明源者復究立旨丹陽喜曰關西已有趙  
悟立河東又得段明源吾教得所傳矣汾州清化李氏築  
精舍延真人因剪柏四株植於庭且口占數語以道其樹  
善本之義柏遂生泰和中樊川維六郎事真人執禮甚恭  
其弟家居城中屢於茶肆見一道者居座傍暇日謁兄樊  
川閱真人貌則茶肆常見者兄知真人未嘗出大加敬信  
遂割別墅朱陽村之柏坡爲築全道庵大安壬申真人拜  
掃先塋諸弟子皆從中路聞空中有聲如樂音合奏真人  
作歌志其異僅成半篇命弟子魯現琦識之時弟子李道  
寶自洛西還至陝遇真人曰向嘗作歌詞未終篇今足成  
之汝其毋忘道寶至清化真人已返真矣舉其詞合現琦

所識遂成全篇衆皆駭異真人閱世六十三明年葬全道  
庵側後清和尹公拜祠下歎其崖巔峻狹改作於坡下額  
曰翠微宮真常李公復奉朝命贈弘立真人真人遠於立  
學得於心宣於口皆成歌詠有仙梯集傳世山東諸郡目  
曰小丹陽初真人居澧西嘗晨起呼衆曰三十年後立教  
大興當有宗師闡化門人徧天下及長春邱真人赴召竟  
如其期弟子入室曰清貧子王德遇洗燈子然逸期明微  
子王志清嗣清貧子者曰呂志真嗣洗燈子者曰張道性  
明微子度李志久主翠微宮事元李謙弘立真人趙公道  
行碑○此碑見甘水仙源  
錄元史李謙字受益鄆之東阿人官至集  
賢大學士文章醜厚有古風學者宗之  
段先生明源名光普號真陽子世居平水性豪俠因酒傷

人避衆入關中拜禮丹陽懇祈出家丹陽教以寡欲澄心  
 摧強抑銳先生力行所聞不數載臻於妙道遂杖策還河  
 東於稷山縣北築了真庵居之壬寅夏忽謂門人曰丹陽  
 宗師將東歸汝等可隨吾往謁甫抵潼關仙仗果至丹陽  
 叩以所進歎曰吾教得所傳矣明昌改元沐浴書頌而逝  
 目光炯然數日不落所著曰明源集祖庭內傳  
 任先生守一號自然子京兆鄠縣人性喜射獵一夕夢入  
 陰府見罪囚拷掠事既覺毀弓矢謁丹陽門下求受道業  
 丹陽斥逐至於數日心益堅乃令供事飲膳服勞三載未  
 嘗少懈丹陽因教以忍辱降心調煉神氣久之有所得一  
 日跪告曰庸鄙蒙師開悟愧無以報願更汲擥三年丹陽

曰汝向未悟須服勤今既有得當進汝真功接引後進先

生拜辭乞食河朔間道緣日盛丹陽返真廬墓三年未幾

忽召門人告以師真令從游道山遂翛然順化時明昌改

元四月十四日也祖庭內傳

周師全道號全陽子世爲古幽巨室早喪父母患奇疾割

股和藥以進疾遂瘳鄉黨稱其孝母終哀毀幾於滅性大

定癸巳詣丹陽席下服勤不懈丹陽付以真訣賜今號無

幾何丹陽詔曰邠近邊鄙汝當往居以弘吾道師承命行

卜庵玉峯山下因人根性語以孝順廉立其無告者收養

庵中邠人爲之遷善貞祐間羌人陷邠師亦在擄中羌識

其異人釋之自是受教者日衆度弟子千人元光末尙書

左丞張公信甫出鎮邠忌師名一日詣庵叩以所修師告以道德性命之理張喜其誠出語人曰周全陽有道者也翼日設齋贈以袍履時遣人間起居焉師亦嘗往來長安統軍完顏公待以師禮正大戊子復還邠十月召門人圓明子李志源囑之曰終南活死人墓祖師開化之地吾欲增葺之世態如此不可爲也汝他日當勉成吾志言訖命衆誦清靜經危坐澄聽而逝春秋八十四士人王才卿者與師爲莫逆友時仕慶陽值天兵圍城甚危忽夢師藜杖造門曰吾今來告別軒冕倘寄此身一失再得實難珍重而去未幾圍解始知入夢之日乃師返真日也遂解印綬屏妻子樂道以終其身乙未關中甫定圖明念師遺命於

南時叔重陽成道宮壬子真常李君奉朝命追贈全陽廣

德引化真人

元李道謙周尊師道行碑○此碑見甘水仙源錄碑文稱張公信甫金史張行信字信甫

元光元年改靜難軍節度使兼邠州管内觀察使未幾致仕哀宗卽位起爲尚書左丞與碑合續通鑑書蒙古圍慶陽在紹定二年己丑據此碑則被圍在元年戊子十月以前三年陳和尚敗蒙古兵於大昌原圍乃解

酥醪洞主曰磻溪集有離苦海詞贈周道全云知君好事從來慕爭奈染浮華難去雖然有意學飄蓬被繫脚繩兒縛住怒怒頂上旋烏兔莫把光陰虛度神仙咫尺道非遙但祇恐人心不悟又鍊丹砂詞贈周道全云守分莫強圖遺興閑居樂天知命任蕭疏萬事休論成與敗兀兀前途失也本來虛得也何如百年反覆乃須與不似中心存道念賢聖相扶此周道全蓋禮長春者與

周全道不知是一人或二人

陶先生彥明字明甫平陵襄陵縣人事父母以孝聞年三十失怙恃棄家居靈寶大定癸巳河間張子靜來爲縣宰告以丹陽弘教終南先生詣劉蔣一見如有夙契丹陽賜今名字遂卜居渭南簞食瓢飲行所受於師者不數歲丹陽召還祖庭問以日用歎曰純而不雜其陶明甫乎復賜之號曰無名子丹陽東歸隱居桃花山逾二十年忽告其徒曰吾昨於定中憶先世嘗居靈光洞今失所在矣後遊女几山見石壁間刻有靈光洞三字中有石牀鐵臼尚在遂葺居之逾十載俄遷居長淵人莫測其意不數日北兵掠女几獨長淵無一騎至人始服其先見正大丙戌秋門

人狄抱玄王抱真請先生就雲溪菴過冬先生日待來春往彼作歸休計丁亥三月抵雲溪與道衆談笑終日翼日端坐書頌奄然而逝年八十六停柩七日頰紅頂溫如熟睡狀明年離峯于君塋諸鳳翼山西啟棺形質不變香風滿谷左丞姚樞爲作墓銘以紀靈異焉

祖庭內傳○姚樞墓銘甘水仙源錄

未載今不可考

薛先生知微字道淵號碧霄子河津人唐薛仁貴之遠孫也大定辛卯謁丹陽宗師操紼侍門庭三載一節丹陽付以秘旨丹陽東歸法弟王志一欲游宦海參師先生慟哭與別衆莫測所以及王抵宦海丹陽已羽化二旬矣其預見未然多類此後游嵩少間結茆內鄉正大王辰冬無

疾而化年八十三著有清虛集弟子數百人惟侯志忍柳志春唐志安范志冲爲入室皆立觀度人於河東雲應間掌教眞常李君奉朝命追贈先生曰昇立眞人祖庭內傳陳先生知命號朝眞子終南袁村人與劉蔣爲鄰瞳重陽祖師屢化度之以家殷富未肯遽拋塵累及丹陽宗師居祖菴贈以青包巾及詩先生悟卽日禮丹陽爲師充祖庭菴主積行立功以醫藥濟人未幾退職閒居呂道安代主其事承安丁巳一日忽手撫呂背曰公緣法甚大將來此菴爲觀度道士數百人公適當其時善自愛吾其歸矣言訖徧辭道侶怡然順化壽八十一明年玉陽宗師買祖菴爲靈虛觀保賜道安冲虛大師號敕領觀事皆符先生言

祖庭內傳

王先生志達號玄通子延安人以戶殷充里正徵斂廉平鄉人敬之大定辛酉友人得疾數日身化爲蛇惟頭面未變往視之見其家人送山麓間卽附草而去先生驚駭從此長往不歸路逢異人告以往師丹陽丹陽初不納求教益堅乃俾隨衆執役未幾付以道要出居雲陽縣默坐十三年後還延安遇旱官民間雨期先生曰今日小雨過三日澤乃足至期果然泰和間羌人入寇人心駭懼先生徐曰請無慮昨吾定中見三千無首人驅五百大獸至後數日捷書至果梟二千級獲駝五百餘頭一日出門仰瞻天表復入坐索筆書頌曰一輪紅日耀中天五色祥雲頂上



旋珍重一聲歸去也倒騎玄鶴海東邊擲筆曲肱而逝時  
大安庚午十二月二日也年六十一有玄通集行世祖庭內傳

任風子范縣人狀貌奇異少孤為酒家傭馬丹陽授以仙  
術修煉於萊陽之遊仙觀或經旬不食隆冬單衣行乞氣

體充粹雙目炯炯言休咎皆應大定甲辰端坐而逝後有  
見於遼陽意為尸解云大清一統志○續文獻通考記

不云丹陽又云宏治甲子冬逝不云大定與此異然  
一統志係取明代志乘當不誤續通考疑誤記也

王丹桂字昌齡禮丹陽為師隱居崑崙山神清洞丹陽訓  
號白雲子祖居在利州有自彼來者言族中親眷聞先生

入道多歲矣未知是王家那一宗派丹桂因作好離鄉詞  
寄之云聊與話行藏生死輪迴豈盡量無奈頑心迷愛欲

滋彰千古悠悠不到鄉幸遇祖重陽開闢全真出世方寄  
語吾宗當省悟消詳這箇從來不姓王著有草堂集行於

世 草堂集○此集  
見道藏輯要

戎體玄號真成子初師事馬丹陽丹陽亦亟稱之性醅古  
簡澹精老莊博覽儒書居嶧之清真觀至元間召見殿庭

封中真大師賜紫金襪兗州府志

酥醪洞主曰道藏輯要載晉真人語錄一卷內有重陽  
祖師修仙了性秘訣有答馬師父十四問按當云馬師  
父答十四問

晉真人名字里居不詳疑亦丹陽弟子也其論全真云  
全真者合天心之道也神不走炁不散精不漏三者俱

備五行聚合四象安和謂之全真也其答馬師父十四

問云第一問如何是鬼神不測處龍虎定相逢答曰那一切虛寂便是第二問如何玄牝之門是謂天地根答曰玄者父精牝者母血元初各八兩合爲一斤一點元陽真炁便是元本也第三問如何是復命歸根曰靜答曰只要心不逐物去不染不着心定意不散神不昧便是歸根若不此者不得歸根第四問如何見性答曰只要無心無念不着一切物澄澄湛湛內外無事乃是見性第五問如何是應物不昧答曰耳雖聽目雖視口雖說只要心不着也第六問如何是天關地軸如何得相守答曰天關地軸亦是神炁二字只要不着不染心定乃炁定心動則炁散若心不動則子母相守第七問如

何是出有入無三尺劍長生不死一丸丹答曰出有入無只是一炁三尺劍慧也長生不死者一靈真性也一丸丹者命也只用清淨無心尋箇靜處坐去更無甚麼第八問如何是調息答曰非有作爲也若得心中無事无息自調但知調息便是有着調息者只可不知見不可着於口鼻今日說與衆師兄別無甚麼只要心無事尋箇靜處坐去弟子只因心中無事得入於大道依此行去第九問如何是達磨大師云提得虛空回面覷答曰虛空是一性回面覷不昧也第十問弟子晚年出家筋血衰敗願師指教答曰補去問如何是補答曰只要頭頭無事萬緣都放下六門不交行只用一箇主人常

少語不着物十二時中常不昧減省睡眠一時放下便是補也第十一問如何是鉛汞答曰鉛是父精汞是母血亦是性命二字第十二問習靜之間有一切念起或更昏睡多如何得念不起昏睡少答曰只是裏頭無物料神炁微細裏頭實有物自然無念不昏睡也第十三問如何是天地不測處鬼神不知處答曰那更有甚麼第十四問如何是十二時中似一時答曰不止十二時中似一時乃至千萬日稍有不似一時卽是早斷滅也觀所論述蓋深有得於重陽丹陽之學者

崔先生道演字玄甫觀之修人真靜其號也賦性雅質無俗韻長讀二教書洞曉大義識者以爲載道之器事父母

以純孝聞廬墓三年去家爲道士師東海劉長生甚得其傳頃歸蔣陵之章家墅下棲焉假醫術築所謂積善之基富貴者無所取貧窶者反多所給是以四遠無天折人咸德之粗工王彰嫉甚必欲致之死地而後已一日與先生遇諸曠輒挽裂偃仆以塊封厥吻而去之彰以爲死矣少之復甦過者驚叫問狀曰我每疾作乃如是後亦不復介意居無何弟子劉志恆請市金山昊天觀居焉邊人楊涓畢琳意在有所詰期以仲冬來過是不至時大雨雪畢因擁帚家庭間獲片楮開看乃先生讓二子寒盟之章也復有橫山馬志定路志亨者事先生有日矣將去以詩爲贖扁諸所居之堂堂菑詩奄然在壁間如新染翰者其神異

類此當貞祐之亂挺身南渡因僑鞏之純陽觀駐錫未幾  
履滿戶外越興定辛巳八月二十九日端坐南向而逝俗  
壽八十有一凡先生平生所爲所行所得唯門人張志偉  
獨具其體云元杜仁傑真靜先生傳碑○此碑在山東長  
清縣高翻八分書丁未上元日立丁未元定  
宗二年也元詩選三集杜仁傑字仲梁濟南長清人正大  
中隱內鄉山中元至元間屢徵不起張志偉後名志純詳  
後

酥醪洞主曰杜仁傑真靜先生傳贊曰天下所貴乎得  
道之士者時其來順其去而已矣非直以乘雲氣跨箕  
尾解水火遺冠舄導以旛幢殿以聲樂然後以爲昇天  
之證吾讀列仙傳涉此說者甚多夫古之隱者深山窮  
谷中恬然委蛻千載而下不知幾千百人不幸不爲世

所知至於泯滅而無所聞幸而爲好事者紀錄而又過  
神其事使後世不能盡信惜哉吾復揣隱者之心恐不  
如其汲汲於駭一時之觀聽也如先生則不然不內  
不外非有非無吾以爲黃耶其教戒精嚴有過乎釋氏  
者吾以爲緇耶其業履忠孝又出乎先儒將前聖之萬  
法輒混而爲一區間者遺馬路以燎原之頌墮楊舉以  
雪庭之書卽遊戲乎三昧此亦豈先生之本心也歟要  
之以慈儉禮讓爲立身之本以詩書語孟爲教人之符  
及其逝也兀然端坐如宴居浩浩乎同造物者遊悠悠  
乎將元氣者與俱是以恩綸一出名隸清都號曰真靜  
不亦宜乎旨哉斯言其得老氏之立旨歟余試取莊子

語而引申之莊子刻意篇云就藪澤處閉曠釣魚閉處無爲而已矣此江海之士避世之人閑暇者之所爲也吹呶呼吸吐故納新熊經鳥申爲壽而已矣此道引之士養形之人彭祖壽考者之所爲也若夫無江海而閒不道引而壽無不忘也無不有也澹然無極而衆美從之此天地之道聖人之德也夫存此道德則所稱死而不亡者壽固自有在豈必白日上昇乃爲仙者哉全真家之學有類於是其弟子亦多能守師傅不特真靜也故余於道術中獨有取焉

離峯子諱道顯出於文登于氏事長生劉君年未二十便能以苦自力丐食齊魯間雖腐敗禾棄蠅蚋之餘不少厭不置廬舍爲定居計城市道途昏暮卽止風雨寒暑不卹也行丐至許昌寄嶽祠通夕疾走環城數周日以爲常其堅忍類如此嘗立城門之側有大車載藁枯而過藁觸其鼻忽若有所省懽喜踴躍不能自禁爲一老師鎖閉空室中三日乃止初不知書自是日誦數百言有示老莊者隨讀隨講如迎刃而解不數年徧內外學作爲歌詩伸紙引筆初若不經意皆切於事而合於理爲人偉儀觀器量寬博世俗毀譽不以關諸心獨於周急繼困恒若不及也南渡後道價重一時京師貴游聞師名奔走承事爲門弟子者不勝紀正大中被旨提點亳州太清宮賜號紫虛大師初隱觀津女几之桃花平過洛陽得其師劉君舊隱葺居

之是爲長生觀住太清三年避壬辰之兵於盧氏漆水公  
迎置鄧下俄以疾終春秋六十有五門人衛致夷輩葬之  
長生觀張內翰敏之離峯子之舊叙其歌詩曰師自以其  
言爲道之棄物今所以傳者欲知此老林下百眠塵中幾  
蛻耳又曰悠然而風鳴汎然而谷應彼區區者或以律度  
求之是亦按天籟以宮商責渾沌之渺丹青也孫伯英河  
洛名士在太學時出高獻臣之門若雷希顏辛敬之劉景  
立皆天下之選伯英與之遊頭角嶄然不甘落其後一見  
師卽北面事之竟爲黃冠以歿云金元好問離峯子于公墓銘○此銘見遺山文集張敏之名本高獻臣名庭玉雷希顏名淵辛敬之名愿劉景立名昂霄并見中州集漆水公詳後  
趙先生抱淵號還元子俗呼曰魔哥延安之鷄川人自幼

有志方外嘗結庵以居事母至孝鄉黨共稱之後因戴柏  
高師父引詣劉真人席下得授心印隱居陽山一紀不出  
素不讀書一夕忽夢真君召賜金一席辭弗受復以道德  
二篇付之卽吞入腹自是心地開通詩歌泉湧因自述云  
昨日庵前遇莊列二人點我長生訣又云尋箇知音尋不  
得野人獨步下秦川遂來終南祖庭參重陽立旨大蒙啟  
證後游歷名山寫意詩酒間自稱太上弟子晚年還鄉住  
迎祥觀泰和五年甘泉縣道友敦請住菴先生作無夢令  
詞答之末句云相別相別來歲春分時節次年二月上遣  
使召赴闕先生固辭曰吾一老村夫耳使者堅索登程先  
生與道友門人言我且當迴避遂沐浴正冠而坐至三更

忽電光滿室聲震如雷衆驚駭奔視則先生儼然逝矣留  
頌云松梢皓鶴向風冷只有翻雲歸去心萬里青天一片  
雪儘教華表柱頭尋是夜正春分際也年七十二使者繪  
眞容具告其事朝野驚歎復遣使齎贖會葬建祠樹碑用  
彰仙蹟焉金張子獻延安路趙先生本行記○此記見甘  
中賜紫金魚袋文未云使者索子記以傳不朽則當時在  
延安作也劉眞人當卽長生承安三年金章宗曾召長生  
赴闕故稱以眞人泰和三年長生上昇趙  
抱淵爲其弟子故六年章宗復召之也

二張仙翁一名崇眞澤州人一名道溫京兆人同居澤州  
西上町社修真觀偕出東游海島遇劉長生密傳妙法復  
歸結茅於觀旣相繼坐蛻瘞之同穴後數十年猶有見者  
人傳皆仙去續文獻通考參  
大清一統志

酥醪洞主曰北游語錄云長生師父預言未兆之事甚  
多未易一一舉似如呼老冀先生來堂下不數日化去  
朱二官人亦無故召去七日化冀公人號冀山岡爲其  
家以陰陽二宅爲業棄妻子出家有大志住神山十五  
年不復窺其門長生師父問人曰萊州誰氏爲極富人  
以其極富者對師曰俱不富於冀山岡先生此公已得  
清靜果雖滿地金玉如何買得此非極富者乎朱二官  
人心地雖未至此其功行甚大冀山岡朱二官人其名  
字事實未詳亦長生弟子也以先長生羽化世無有紀  
其道行者耳

辛希聲河東平陽人自幼出家去鄉里遠游參禮王玉陽

真人窺至道之要玉陽唱道偈頌文字頗多四方傳播獨  
所著五言長韻金丹詩訣一章希聲私藏甚久人無知者  
年既老託跡陝州與二三同志修靈虛觀因念先師玄妙  
之文不可終秘乃刻之石以傳金辛愿大金陝州靈虛觀記

張信真號希夷子樂安人母夢馭鶴仙人現空中遂感而  
娠泰和中年十五參禮大通爲師戒行精嚴祛邪治疾大  
有靈應後於天長觀問天師授正一盟威秘錄賜號真人  
年五十五當晝凌空而去續文獻通考○大通卽郝大通此張信真與真大道教嗣陳師正著有立真集者同名係別一人

以上馬劉王郝諸真弟子譚長真弟子無考水雲集然子亦不得其姓名附記於此

酥醪洞主曰余記重陽及長春諸真弟子一經指授其  
道行皆卓絕可傳然則世之證道者必遇至人乎非也  
學道貴有根器尤貴精專自非然者雖遇至人亦無證  
處北游語錄云祖師初至登州有介官人素好善事常  
殷勤接待後祖師得馬譚二師復過登州介公率衆致  
齋請出家意謂祖師經二年方得馬譚二人今予自請  
必將欣納懇求再四不許他日復請亦不許介公退祖  
師謂諸人日有二人於此欲建殿宇一人基址旣立材  
植旣豐未求工匠工匠自往何哉材旣備而功可成也  
一人指其立基之地窪坎未平一材未施工匠望之而  
去不復顧矣又云昔有礪劉道人於關西持不語功化



自然飯志行苦卓曾十六日不得食亦不敢起別念度此困厄至十六年師父亦憐其苦節然性不循良物或輕觸則猛暴如火後歸鄉里二年中凡兩過予漸見氣象不佳語言差互年近六旬後果還俗又云丹陽師父道童安蓬萊幼而聰敏既長無所不通文章醫藥之學皆得其妙以此見解造道不難常離羣獨居師父深惜之欲置左右竟不肯從又云玉陽大師曾說一道人不肯修持云我打無爲顛狂自縱惹起官府棒死盤山語錄云昔山東有一庵主臨終遷化淹延不得脫離使人問長春真人真人云往日但着於外緣物境上未曾修煉以此纏綿不得解脫乃寄與語云身非我有性本虛

空一念不生全身放下庵主聞此語心若有省乃囑衆兄弟云我以外緣所昧心地無功因此臨行不決今勸汝等各各下功修煉身心救此生死大事去言訖遂終觀以上諸人親炙諸真卒無成就證道豈易言耶雖然人苟能擺脫外緣一志於道不以嗜欲賊其身不以窮阨累其心使神氣常清德性常固莊子曰惟道集虛虛者心齋也學至於心齋而坐忘雖不遇至人其於證道也蓋庶幾矣



此書之序  
人皆謂此書  
獨以士商人  
志各各不  
吳弟三弟  
卷一

文淵閣  
三

三

